

姓

得謚名臣傳 卷二

四十六



八旗通志初集卷之一百八十六
名臣列傳四十六

鑲白旗滿洲得諡大臣

霸拜

馬喇

赫碩色

杭愛

胡圖

圖納

納齊喀

鑲紅旗滿洲得諡大臣

覺羅伊圖

溫達



郭璉

馬祐

額爾德黑

德成

正藍旗滿洲得諡大臣

甯古里

對喀納

札穆陽

鑲藍旗滿洲得諡大臣

格爾古德

阿蘭泰

法喀

蒙古得諡大臣附

諾爾遜

托波克

巴圖

善丹

霸拜。滿洲鑲白旗人。姓博爾濟錦氏。世居巴岳特地方。初爲喀爾喀貝子。

太祖高皇帝時。率所部來歸。因以格格妻之。授世職爲三等總兵官。天聰八年卒。子阿郁實襲職。順治七年遇

恩。詔加世職爲二等昂邦章京。是年卒。子賴善襲。十四年。

世祖章皇帝追念霸拜有歸附功。

賜白金四百兩。立碑墓道。謚僖順。碑文云。朕惟國家開

創大業。必有英賢佐命。建立鴻勳。生固顯秩。崇階振
威德於天下。歿亦榮名。美謚傳盛。烈於後昆。此錄故
舊之深恩。勸忠臣之巨典也。緬惟我

太祖

太宗時。舊臣推誠宣力。矢志服勤。貞心亮節。屹然不磨。
朕豈能已於追念也哉。爾霸拜。原係蒙古喀爾喀貝
子。能識時運。倡率部屬。首先投順。因以格格配爾。授
三等精奇尼哈番。爾能益勵忠誠。稱乃厥職。今追述
往事。軫念前徽。小心恭慎。和比於理。謚曰僖順。以垂

不朽。特命勒諸貞珉。光及泉壤。用昭朕故舊不遺之
至意云爾。孫明阿圖。以從征吳逆。至廣東韶州府陣
亡。恤贈拖沙喇哈番。見忠烈傳。

馬喇。滿洲鑲白旗人。順治六年。補理藩院筆帖
式。時大同逆鎮姜瓖叛。即奉差往調蒙古二萬
人。解大同府之圍。事平。議敘。授本院他赤哈哈
番。管主事事。旋陞員外郎。十八年五月。伯父尼
堪病故。無親生子孫。以所得世襲三等精奇尼
哈番世職。分襲於子弟馬喇。分襲三等阿達哈

哈番陞本院郎中。康熙十四年。察哈爾布爾呢反。馬喇從信郡王鄂札往征。平定後。議敘陞通政司通政使。十五年正月。陞禮部侍郎。十六年十月。陞工部尚書。兼鑲白旗護軍統領。二十年。緣事罷。以世職辦事。二十二年四月。以羅察等私入黑龍江界內耕牧。

聖祖仁皇帝特諭議政王大臣等。今我兵移駐黑龍江。當乘此發烏朱穆秦兵。聲言捕鹿。以疑羅察。復遣大臣一員。至索倫預備軍需。亦聲言捕鹿。人將至。其令

理藩院尚書阿穆瑚瑯。往烏朱穆秦。阿達哈。哈番。馬喇。往索倫。七月。疏言。索倫總管博克等。所獲羅察及軍前招降者。共選五人。遵

旨送京。餘二十六人。皆迫於大兵。始行投誠。索倫。距羅察近。不宜久留。應一併解京。交戶部安插。博克等所獲宜番。米海羅。莫羅。對二人。賞以衣帽。遞至薩布素處。放還。請飭理藩院作書。令持去。約其離我邊境。還爾本土。以逋逃來歸則已。否則我亦納爾逋逃。即往來之人。亦必擒戮。疏入。得

旨如所請二十三年五月馬喇等疏報臣至索倫屢行
密詢羅察情形皆云現在雅克薩尼布潮二城
各止五六百人其得以盤踞多年者惟賴額爾
古納口至雅克薩十餘處雅克薩至布爾馬大
河口十餘處築室散居耕種自給因以捕貂尼
布潮田不登但取資納米雅爾諸姓貢賦喀爾
喀巴爾呼人時販牲畜等物至尼布潮尼布潮
亦捕貂與之交易得以生成臣請勅喀爾喀車
臣汗收其所部附近尼布潮者兼禁止交易再
請勅黑龍江將軍水陸並進作攻取雅克薩狀
因取其田禾則羅察不久自困量遣輕騎勦滅
似易

聖祖從其言先遣人傳示羅察云爾等據我雅克薩尼
布潮多歷年所屢言撤還遷延不去且收我逃人侵
我邊民今大兵水陸進勦爾其遠退以保餘生并將
馬喇等奏移文車臣汗知之二十四年正月

特諭大學士覺羅勒德渾等馬喇自遣用以來殊爲効
力且頗知雅克薩諸地勢著授副都統銜叅贊軍務

四月馬喇等疏言。臣等今年正月二十八日。遣打虎兒副頭目倍勒兒等。率三十人往雅克薩城北。生擒羅察七人。逸去一人。現在六人。遞至京師。得

旨。倍勒兒等直抵雅克薩。探其情形。生擒羅察可嘉。所司如例獎賞。其送至六人。各給時服一襲。送將軍薩布素處。俟大軍進勦時。示以寬大之意。悉行釋放。二十九年三月。馬喇仍以護軍統領同都統額黑納。前鋒統領碩鼐等。奉

命往歸化城。率喀爾喀兵進征噶爾丹。三十年五月。議政大臣等議。派兵往土喇地方探聽厄魯特聲息。遂令馬喇同定北將軍都統瓦岱。副都統碩代。噶爾馬率兵前往。七月至克魯倫。探哨噶爾丹已去。遂回軍。是年陞授西安將軍。三十一年三月。署副都統一等侍衛阿南達等。疏報巴圖爾額爾克濟農降。

聖祖諭議政王大臣等曰。巴圖爾額爾克濟農來降。但其人未可深信。或時序不宜。馬匹羸瘦。不得已而降。

令其子來朝。往返之際。馬匹休息。又復逋逃。亦未可定。將軍馬喇等現與相近。日擊情形。宜乘此機會。共商。徒入內地之策。斷不可縱。使復逸。尋馬喇疏至。送

巴圖爾額爾克濟農及其子來朝。優賚遣之。九月病故。

賜祭葬如典禮。謚敏恪。祭文稱其秉資忠亮。奉職恪勤。號令嚴明。才猷練達。又立碑墓道。碑文云。朕惟國家綏靖封疆。必資果毅之臣。寄以元戎之任。勤勞克著。恩禮斯隆。生膺顯秩之榮。歿享飾終之典。所以酬勲

庸。示褒勸也。爾馬喇秉志純誠。賦才英偉。早承前緒。聿將匪懈之忱。分典禁兵。能勵靖共之誼。奉討謨之指授。削平雅克薩城。宣服遠之威靈。釐定鄂羅斯界。特膺簡命。作鎮秦關。訓練多方。紀律明而偏裨奮勇。拊循罔倦。慈惠溥而卒伍騰歡。允稱閭外之材。克協師中之吉。遽聞溘逝。深悼朕懷。爰考彝章。宜頒渥澤。謚名敏恪。以表嘉猷。嗚呼。虎旅星沉。永念干城之佐。龍章日麗。用昭簡牘之光。勒以豐碑。垂諸奕葉。不亦休歟。

赫碩色。滿洲鑲白旗人。順治十五年十二月任三等護衛。康熙十四年十一月。陞頭等護衛。二十三年九月。陞王府長史。三十年八月。侍衛海清傳。

旨。赫碩色在阿哥門上効力年久。出使勤慎。有功可嘉。別王府長史官皆不能及。因賞圍場所穿袍褂各一帽一陞滿洲副都統。三十一年陞都統。三十三年五月病故。

賜祭葬如典禮。謚敏恪。立碑墓道。碑文稱其性賦樸誠。才兼果毅。起家禁近。効職宗藩。俾副典戎。竭誠軍國。特加休命。游擢統軍。奉國之誠。始終如一。匪躬之節。夙夜時虔。方切倚毗。遽聞溘逝。軫懷曷已。渥澤用頒。爰與易名。謚曰敏恪云。

杭愛。滿洲鑲白旗人。初由部屬累官至通政使。康熙三年。陞工部右侍郎。時輔政大臣鰲拜專擅。杭愛抗不依附。六年。以京察自陳。遂解任。八年七月。鰲拜既得罪。杭愛訴從前之枉。事下大臣等察議得實。九年。起補盛京刑部侍郎。十年。

九月。

聖祖仁皇帝幸盛京。召將軍副都統及杭愛諭曰。盛京人民淳樸。獄訟事簡。非甚難理。爾等膺荷委任。惟當撫輯軍民。愛養招徠。滿洲人民。悉賴農業。宜多方勸諭。開墾耕種。俾各遂生計。副朕睦念發祥重地之意。尋改杭愛山西布政使。十二年。陞陝西巡撫。十三年。逆藩吳三桂反於雲南。四川文武大員降賊。

聖祖以漢中係川陝咽喉。糧運要道。令率西安滿兵百

名。同輔國公綽克託駐守。十二月。陝西提督王輔臣因兵變叛降於吳逆。杭愛奉

勅與總督哈占。撫綏招納。時定西大將軍貝勒董額方受

命撥西安兵。俾振武將軍坤巴圖魯副都統翁愛等率赴漢中。其糧餉並屬杭愛。就駐所設法支給。十四年二月。賊犯蘭州。城陷。巡撫華善奔涼州。改命將軍席卜臣守漢中。而以杭愛協哈占守西安。時三邊兵屢經調遣。多缺額。河西道梗。糧運不繼。

聖祖以召募營伍屬提督張勇。以籌餉屬杭愛。馬是年
王師進取四川。杭愛與張勇並鎮守陝西。十七年
調四川巡撫。屬吏嚴憚。不敢干以私。建昌土司
安泰寧負固跳梁。勇畧將軍趙良棟疏請勦滅。
聖祖特命杭愛與奮威將軍王進寶加意招撫。若抗拒
不服。乃從所請。杭愛遵

旨。悉心化導。安泰寧降服。於時滇黔未靖。大軍之在永
寧路者。供費浩繁。皆杭愛率布政使劉顯採買
督運。勞動甚著。二十三年卒於官。

賜祭葬如典禮。謚曰勤襄。立碑墓道。碑文稱其恪慎矢
心。精勤奉職。總藩晉地。著聲績於當年。擁節關中。弘
撫綏於比屋。值逆氛之未靖。我武維揚。念轉餉之罔
愆。爾猷具在。迨移旆於蜀省。復効績於巖疆。勤黎庶
之招携。功收鎮靜。勵耕桑之作息。業奏牧寧云。

胡圖。滿洲鑲白旗人。初任駐防江寧協領。康熙
八年。陞江寧副都統。十三年。逆藩耿精忠反。

聖祖命同副都統馬哈達率所部兵赴杭州。會將軍圖
喇商酌行事。尋

特命賴塔爲平南將軍。胡圖馬哈達並叅贊軍務。八月。領兵至石梁大溝源等處。擊敗賊衆。十月。僞都督周烈等率兵三萬謀犯衢州。將軍賴塔令胡圖等統兵禦之。復敗賊於焦園地方。生擒僞都司等。十五年。僞將軍馬九玉爲我兵擊敗。南遁。胡圖復率兵破之。恢復常山縣。十七年。同海澄公黃芳世等率領滿漢官兵。連破漳州海賊陣。斬僞提督總兵等。焚燬船隻器械無算。二十三年。擢鎮守杭州將軍。二十六年卒於任。

賜祭葬如典禮。謚敏恪。立碑墓道。碑文稱其久典禁兵。夙嫻韜畧。初橫戈於三楚。戮力行間。繼擐甲於八閩。佐戎閩外。迨移旌建業。藉作干城。旋秉鉞錢塘。倚爲保障。嚴明師律。不聞徒御之驚。整暇軍容。盡識旌旗之色。云。

圖納。滿洲鑲白旗人。姓洪莪氏。世居哈達地方。康熙十一年。初任內閣中書。十三年。陞侍讀。十五年。再陞侍讀學士。明年。

特授詹事府詹事。十八年。遷內閣學士兼禮部侍郎。二

十五年擢山西巡撫二十六年陞川陝總督明年晉刑部尚書三十六年以疾卒卒後

聖祖特諭刑部曰爾部事關人命甚屬緊要自圖納任刑部以來勤勉供職事甚修舉屬員至今稱善焉尋賜祭葬如典禮謚文恪立碑墓道碑文云朕惟宣力服勞臣子奉公之誼旌能彰善朝廷恤下之仁矧夫位列卿曹職掌邦禁始終一節罔替忠勤生既被以殊恩歿宜加夫異數聿頒寵綍用慰幽扃爾圖納秉性端方賦姿明敏自升仕版即居禁掖以敷文游歷宮

端復筮綸扉而贊采靖共爾位精白乃心爰特畀以封疆俾爾膺夫節鉞撫循晉地既弊剔而利興保障秦關復民安而兵戢擢司秋典益裕春溫庶獄精研仰體好生之德五刑欽恤上孚慎罰之衷民皆恃以不寃朕每嘉其淑問迨夫軍旅馳驅之會著有機宜相度之勞志實篤於棊忱才更優於練達生平^數別歷並懋功庸夙夜在公方蒙眷倚豈期溘逝深切軫傷是用載考彝章適昭卹典謚曰文恪以備哀榮嗚呼忱隆報國常懷匪懈之純忠禮重易名克享無窮之

令聞。勒之貞石。式賁千秋。

納齊喀。字詞宗。滿洲鑲白旗人。世居長白山。父賽喀那。以世襲拖沙喇哈番。隨征逆藩吳三桂有功。仕至副都統。兼本旗佐領。垂老善病。納齊喀侍湯藥。至久不衰。父卒。哀毀骨立。事繼母。納蘭氏尤盡禮。及議世職。納齊喀以次宜襲。固讓其季弟。人咸稱其孝友。尋以大學士伊桑阿。阿蘭泰。選入內閣學習。未一年。考取中書。旋隨大學士席哈納。赴湖廣審理容美土司田舜年案。納齊喀廉知干連。無辜土漢婦女百十餘人。密告席哈納。請釋放。又念其貧苦。捐己俸資之。還鄉。衆皆焚香叩頭而去。事竣回京。地方官例有饋送。席哈納以身居大僚。却不受。納齊喀亦固辭。席哈納大喜曰。汝能操守。似我將來功名不出我下也。在內閣中書十九年。轉典籍。引

見奏對明晰。

聖祖仁皇帝稱之。越三年。遷刑部堂主事。尚書哈山。令兼福建河南兩司事。舊案山積。不數月爲之一

清。本部尚書侍郎以才能薦。擢本部員外郎。尋有奸欺重犯德林潛逃海上。奉

旨擇才能官二員。赴山左密緝。尚書哈山舉納齊喀。及舒林同往親受。

聖祖密諭。佯以巡海為名。比至膠州。即行擒獲。

聖祖特命從優議敘。陞兵部郎中。時值策妄阿喇布坦跳梁沙漠。軍務旁午。令於密本房隨議政大臣辦事。康熙五十七年。授揚州權關監督。以裕國恤商為念。舊例五尺小船。每日過關。亦必徵稅。

納齊喀謂此皆貧苦細民。出示豁免。其餘往來船隻亦無苛索。商民船戶無不懽呼。以為從前權使未有也。任滿回京。奉派往阿爾泰地方養贍歸順之兀良海厄魯特。各部落二千七百餘人。仰體

聖祖德意。竭力供給。俾日用饒裕。人人得所。事訖自軍前馳歸復

命

聖祖嘉獎再四。未幾本旗佐領缺出。列名引

見

聖祖又面問派養兀良海各部落事奏對稱

旨。即令兼管本旗佐領事務。六十一年十月。山西布政

使缺出。本部尚書孫柱。白潢。侍郎查弼納。咸薦

納齊喀。操守素著。尋又

命九卿列名保舉。納齊喀名亦與焉。引

見時奏履歷語未竟。

聖祖即命停奏云。朕深知爾能自愛。誠好官也。即授山

西布政使。有汾水縣令魯直者。抵任未匝月。即

具文乞休。納齊喀疑有他故。檄調親驗。實無病

狀。細詰所由。始知前任虧空銀五千餘兩。本府

勒受交盤。懼不能償。故耳。即白巡撫德音。力為

清理。復令之任。雍正元年正月。

特授湖廣巡撫入京

陛見奉

優旨云。朕素聞爾居官聲名甚好。故授爾為巡撫。爾可

將山西布政司任內事宜奏聞。納齊喀奏言。臣到山

西。為日無幾。又值

聖祖仁皇帝賓天大事。臣日夜號泣。未能報答。

國恩。惟將屬員餽送。及一切陋規。盡行除革而已。上諭云。爾今任巡撫。仍如此作清官。將來受朕之恩。自無既矣。翼日復

召見。諭令即速抵任。以御用貂帽賜之。頻行恭請。

聖訓復

特賜

聖祖仁皇帝御用器物數事。且

諭曰。爾奉此物。即如瞻仰

皇考也。納齊喀叩頭流涕奏謝。既抵任。安靜持躬。寬厚御下。與總督同寅協恭。一以忠

國愛民爲務。楚地俗奢。民貧。每有司謁見。必諄諭

加意撫綏。使民敦樸。素在任二年。章疏文移。皆

親定稿。不假手幕客。積勞致疾。是年楚地饑。民

鮮食。特令各地方官設廠煮粥。全活甚衆。又以

截留漕米久貯不糶。恐致霉爛。疏請易穀備儲。

一以甦民間青黃不接之困。一以免州縣官霉

爛倉米之愆。

俞旨先行一切訟獄多所平反。馭麾下將士恩威並濟。接僚屬介而不苛。謙而有禮。兩值賓興。監臨試事。天公矢慎。弊竇肅清。武闈更加意甄拔。在任蒙

賜御書金扇。

御製五言詩一首。納齊喀益感激圖報。然遘疾日漸危

薦

特命太醫田玉赴楚診視。并

賜諸珍藥。具劄子。

奏謝

御批云。自差大醫去後。朕甚望懷。田玉奏至。言爾無甚大病。朕深慰悅。爾善自調養。諸飲食宜忌。務聽田玉之言。其平常事件。可令布按兩司代辦者。令其代辦。至細微之事。須惜精神。務遵朕旨而行。將朕旨亦曉諭司道等。伊等若作弊行無恥之事。俟爾病痊之日。察出題叅。朕必加倍治罪。然病訖無起色。具疏入告。特旨著給假調養。俟其全愈再辦事。巡撫印著總督楊

宗仁暫行兼署。

命下無不歎爲異數。蓋巡撫在任養病實從前所未有也。五月初三日卒。遺本至欽奉。

恩旨。納齊喀簡任巡撫。敬慎自持。實心任事。忽聞溘逝。朕心深爲軫惻。應得卹典。著察例具奏。既而禮部循例以在任未滿三年。給與半葬議覆奉。

特旨給與全葬。

賜謚曰勤恪靈柩抵京。

特旨著進城。遣大臣侍衛往奠。皆曠典也。子六人。永泰仕至都給事中。

覺羅伊圖。滿洲鑲紅旗人。生而警敏。辦事勤慎。在部院著有勞績。順治元年二月。增設內三院學士各一員。以伊圖爲秘書院學士。九年正月。充

太宗文皇帝實錄副總裁官。五月。改刑部。啟心郎綜理全部事務。敷對明敏。十一年七月。

特旨陞刑部尚書。旋緣事解任。十四年四月。事白。起補兵部尚書。十七年五月。轉吏部尚書。十八年七月。晉文華殿大學士。在內閣年最久。謹密小心。

從無過失。康熙十三年。逆藩吳三桂耿精忠反。機務繁勞。十六年七月卒於官。

賜祭葬如典禮。立碑墓道。謚曰文僖。

溫達。滿洲鑲紅旗人。姓費莫氏。世居長白山布爾哈屯地方。父胡世禮。任世襲佐領。工部員外郎。溫達幼孤。備嘗艱苦。稍長。屢省問前事。聞寡母言。輒嗚咽不能止。初爲官學生。徒步往太學肄業。及爲都察院七品筆帖式。始用蹇驢代步。所得俸銀。專爲祿養計。或遇希得之物。必竭力

致之。以悅母心。未幾。差隨御史巡鹽浙江。佐御史清釐諸弊。商竈咸以爲便。康熙十一年母卒。哀毀骨立。喪葬盡誠。十三年。陞都察院都事。十七年。陞戶部員外郎。累任山東江南福建三司。十八年。廣西歲歉。閏七月奉

命查荒。親行瘡癘巖疆。務令均蒙

聖澤。既而江南游饑。又奉

命馳驛往賑。江淮萬井咸得其所。十九年。陞監察御史。巡視南城。又巡中城東城。管鼓廳事。奸豪屏跡。

二十五年轉吏科給事中。隨陞本科掌印。在任十年。考覈精嚴。不露圭角。凡有疏奏。即削其稿。供職垣中最久。既而西北鄂羅斯國所屬羅察。竊入黑龍江地方耕種。

聖祖仁皇帝命將討罪。溫達以給事辦事軍前有功。三十三年兼管佐領。三十五年陞兵部督捕司右理事官。是年三路分兵進剿噶爾丹。

聖祖命溫達爲中路淳郡王允祐營內叅謀。凱旋奏事。明敏。載平定朔漠方畧中。三十六年。

聖祖以西寇蕩平。遣官祭告嶽瀆。奉

命分祭南鎮會稽山。十二月陞內閣學士。三十八年陞戶部右侍郎。奉

命從邊外往陝西安設驛站。經西涼甘肅回道。臯蘭酌遠近形勢。安置郵傳。旋以原銜兼議政大臣。轉吏部左右侍郎。充

經筵講官。陞都察院左都御史。數年內游膺顯秩。聖祖眷注甚隆。溫達敬謹彌至。在吏部時。雲貴總督與貴州提督互相訐奏。

聖祖特命往審。比至貴州。對簿閱實。馳奏稱
旨。往例奏對。以讞語供詞。截分前後。故意義難通。溫達
不構成格。於定擬之處。即擬招供之詞。實之使
情罪相比。

聖祖深嘉之。飭令爲式。又奉

命往貴州審威寧總兵官一案。瀕行。恭請

聖訓。

聖祖召入內廷。指示詳盡。以時逢溽暑。令緩坐肩輿。不
必馳驛。既底貴州。將弁俯首抒誠。遠懾。

天威。無敢觖望。未幾。又奉

命審工部一案。弊實剔清。官常振肅。爰書既定。

聖祖即命爲工部尚書。時康熙四十三年三月也。莅任
謹審出入。四十五年十月。

特旨溫達自任工部。聲名甚優。凡事敬慎而寬。著調補
吏部尚書。四十六年十二月。

特命入贊機務。授文華殿大學士兼吏部尚書。在閣八
年。自以精力漸衰。恐悞機務。五十三年正月。具
疏乞休。得。

旨卿耆舊老臣。才品素著。自簡任機務以來。恪慎和平。實心盡職。勤勞歲久。倚毗正殷。覽奏以衰老乞休情詞懇切。准以原官致仕。

予告家居兩閱月。至四月二十日。

聖祖行幸熱河。詣

暢春園送

駕。

天顏甚喜。詔曰。熱河汝住慣地方。今仍隨朕避暑。可以日需克食。調養身心。趣命東裝隨行時。

聖祖眷念彌篤。十二月初六日奉

旨。溫達補授大學士。以來寬厚簡靜。今雖年老。告退尚自康健。著仍任大學士。辦事幾年。閣臣告退復用者。本朝無幾。溫達感激遭遇。力圖報稱。然精神日衰。明年四月初一日奉

命。讀卷內廷。忽患氣喘。初四日扶病回家。

聖祖即於是日遣傳旨。官郎中存柱至家問病。又賜尚方所製保心石丸服之。病勢稍減。初八日遣御醫調治。又連

遣存柱問疾。

溫旨慰諭。五月十五日卒。遺疏上

聞得。

旨溫達久任機務。寬厚簡靜。懋著勤勞。予告之後。朕眷注猶殷。仍起辦事。正期長享遐齡。以承寵渥。遽爾病逝。深切軫悼。應得卹典。著察例具奏。即日

遣皇子及大臣各一人。帶侍衛二十員。攜茶酒致奠。六月十六日。

賜謚文簡。祭葬如典禮。溫達性樂安靜。自通籍後。屏交

遊。未嘗一赴燕會。亦未嘗以杯酒與人接慙。勲然和平。長厚。公卿欽服。生平無嗜好。起居服食。惟期簡適。所居祖宅。傾圮湫隘。有勸改葺者。則泣然曰。老屋數椽。乃先人所遺。覩此如見先人。我不忍棄之。以另圖也。聞者莫不嗟嘆。純孝之稱。人無間言。聲徹

宸聽。五十年十月。

聖祖特諭。大臣有篤行孝義者。署名保奏。如大學士溫達等之孝。不但衆人共知。朕亦深知之。孝者百行之

首果有篤行孝義之人。爾等不可謂無由得知也。五
十一年六月。

賜御書匾額。又

賜御製詩。首句即稱其孝友焉。妻卒時。諸子將擇地卜
葬。即厲聲責曰。有先人之兆。可附。何必他圖。汝
輩知有父母。我不知有父母耶。汝今另卜宅兆。
他日必使我九泉之魄。不得近先人之墓矣。遂
治穴於父塋之旁。在官五十餘年。經二十二轉。
奉

使節者十餘次。纂修

三朝國史。

平定朔漠方略。

大清一統志。

政治典訓。及明史五書。皆奉

命總裁。己丑壬辰乙未三科。

殿試。皆充讀卷官。前後

賜予稠疊。子十一人。俱登仕籍。

郭璵。字子燦。溫達族子。由蔭監生考試。翻譯中。

式康熙十一年補授翰林院筆帖式二十五年
陞內閣中書二十九年以才能保舉差往蕪湖
關權稅三十二年四月陞戶部主事時浙江有
水災奉

旨往勘尅期還報又差往關東賑濟三十四年十月陞
禮部員外郎尋以簡選隨內大臣侯巴渾岱往
科爾沁取回席北人等編設八旗又奉

旨率四旗台吉家人往克魯倫地方稽察哨汛明年隨
辛保喻成龍等往西路運米以米先運至軍前

議敘三十八年七月陞太僕寺少卿四十四年
秋扈從

聖祖仁皇帝巡邊

聖祖於馬上問馬政郭璉奏對明晰巨細無遺

聖祖大加褒賞顧謂近侍曰當年考試翻譯朕取他爲
八旗第一十一月奉

旨郭璉歷官已久人去得著授本寺正卿

賜御書朱子五言詩一幅扇一柄四十五年三月陞都
察院左副都御史仍兼管太僕寺事四月奉

旨郭琛人甚賢能。安靜勤懇。著巡撫雲南。

陞辭之日。

賜鞍馬併眼鏡。諭之曰。雲南乃極邊地方。以爾賢能。特加簡用。爾往當小心辦事。雲南糧食豐足。地方太平。爾但當加意愛惜兵民。不得生事。既為督撫。必不至衣食缺乏。前任督撫一味欺蔽。爾當以此為戒。是年

秋。丁母憂。奔喪至中途。

特旨慰留。在任守制。四十八年五月。

賜清文鑑全部。明年循例。

陞見於三月至

京。恭請

聖安。蒙

恩。顧問治狀良久。方出本月。

聖祖駕臨西廠子。閱漢官步射畢。

命巡撫郭琛射。三發三中。

聖祖大悅。顧問謂左右曰。射箭是他雲南專門。又云。他學

問亦好。四月。恭請

聖訓。并奏赴任日期。

聖祖諭曰。爾做官聲名。朕已深知。不必再下訓旨。以後只如此做去。即是好官。尋

賜御書進善詰奸匾額。及九天雨露隨符印。萬里烟嵐奉簡書對聯。十月。陞雲南貴州總督。五十年七月。

賜孔雀翎。五十五年五月卒於任。十月。

賜祭葬如典禮。謚恪勤。立碑於墓。碑文稱其器宇淵深。才華英敏。自登郎署。奉職宣猷。游長罔啣。在公贊采。遂晉階於憲府。惟精白乎乃心。用膺秉節之榮。出撫天南之地。旋以滇黔重鎮。命爾總制邊陲。澤已被於

一方。政復施於兩省。恩威並濟。羣吏肅清。德化遐宣。百蠻綏靜云。

馬祐。滿洲鑲紅旗人。姓哲伯氏。世居韓楚哈地方。

太宗文皇帝初命八旗習漢文。馬祐即在官學肄業。順

治初年。考授兵科。他赤哈哈番。九年壬辰科會試中式進士。選為敬謹親王教習。授拜他喇布

勒哈番品級官。尋陞刑部員外郎。時初設欽天監。滿官以馬祐為欽天監監正。康熙八年。

特簡江寧巡撫。

陞辭之日。

賜御饌及衣服鞍馬。十一年六月。疏言高郵興化等州縣連年水災。蒙

聖恩屢次蠲賑。保全災黎。今歲新涸田地。勸民播種。二麥將成。不意又遭清水潭堤岸衝決。田廬仍被淹沒。前部覆督臣麻勒吉所請蠲賑之事。令於本年四月終停止。今各州縣田地復遭衝淹。涸出無期。民生困苦。視昔愈甚。懇請照常賑濟。俟

水涸可耕。停止下部議行。十五年卒於任。奉

聖祖仁皇帝旨。加祭二次。予全葬。謚清恪。立碑於墓碑。文稱其性行清廉。才能敏練。簡任巡撫。悉心料理。率屬惠民。著有勞績云。

額爾德黑。滿洲鑲紅旗人。累官至王府長史。數從征伐。著有勞績。雍正五年九月。以疾卒。子噶爾弼。時任奉天將軍。懇

恩賜謚奉

旨。予祭葬如典禮。謚果毅。立碑墓道。碑文稱其昔仕藩

僚屢隨軍伍。身能奮勇。歷戰陣而愈雄。職在從征。著勤勞而不伐云。

德成。滿洲鑲紅旗人。康熙三十三年。由監生任筆帖式。三十七年。外轉永定河筆帖式。四十三年。陞禮部主事。五十六年。兼任副叅領。尋因本部保舉才能。同都統胡里。往辦雲南兵營事。明年。即軍營。陞工部員外郎。經雲南四川等地。五十九年。又同將軍噶爾弼。領湖廣滿洲兵進藏。俱在行間。雍正元年。兼管佐領。尋陞工部郎中。

三年。陞叅領。尋擢本旗副都統。七年。遷正黃旗護軍統領。旋晉正紅旗滿洲都統。兼管火器營事。九年。派往西寧。辦理夷情事務。明年正月。以疾卒於任。

賜祭葬如典禮。謚勤僖。立碑墓道。碑文云。朕惟人臣。受任中外。宣力朝廷。翊衛之勤。典司夫禁旅。服勞之誼。克著於邊陲。載考彝章。宜加褒卹。爾德成。稟性樸誠。持躬謹飭。始官郎署。兼叅佐領之班。繼直周廬。遂副統軍之任。朕撫臨區夏。益茂恩榮。歷躋都統之崇階。

並轄京營之火器屬承簡命蒞職師中司輓運於西
寧駐旌麾於青海倚畀方切溘逝遽聞爰賜謚以易
名用飾終而垂後於戲龍章特賁絲綸垂五色之光
馬鬣初封珉石歷千秋之永昭諸奕世不亦休歟

甯古里滿洲正藍旗人初任筆帖式累陞至吏
部啟心郎崇德六年征明圍錦州松山杏山甯
古里並從征有功七年十一月隨鄭親王濟爾
哈朗入明邊多所俘獲旋遣甯古里等還

盛京報捷順治四年六月以考滿稱職授半箇前

程尋緣事革職十四年四月

世祖章皇帝念其前功

特諭吏部曰甯古里前犯罪革職原在部諳習事務且
同事各官已經起用著遇侍郎缺出即行推補十五
年補禮部侍郎十八年十二月條陳三事一言
邊外蒙古到京多置兵器因而間散蒙古托名
兵丁任意購買甚且有買去轉鬻者請勅關津
嚴行搜查一言各直省設立官兵原以撲滅賊
寇平定地方頃者小醜竊發或嘯聚數千人總

督提鎮等官。不率所屬官兵。預爲堵禦。竟請大兵。以此觀之。在外營伍。有名無實。請勅總督提鎮。嗣後無得輒請大兵。以致糜餉擾民。一言各直省有罪人犯。應解部審問者。請勅部密行督撫解送。無得差官拏解。以省驛遞供應之費。疏入。

詔從所請。康熙元年四月。陞都察院左都御史。尋轉吏部尚書。二年卒。賜祭葬如典禮。謚曰勤敏。

對喀納。滿洲正藍旗人。姓鈕祜祿氏。世居渾春地方。其長兄曰班布里。

國初。率丁壯來歸。尋以軍功。授世職爲二等阿達哈哈番。見勲臣傳。順治元年十月。對喀納任內院効力筆帖式。二年二月。陞工部主事。九年九月。擢本部郎中。十一年二月。遷刑部啟心郎。十五年七月。裁啟心郎缺。至十七年七月。補授都察院左副都御史。未幾。轉刑部右侍郎。康熙二年七月。轉左侍郎。四年四月。陞本部尚書。五月。

應

詔言事。言年來奸民專以訐告爲事。凡赴部院控告。及叩閭。指稱窩藏于七。并夥黨名色甚多。因事關叛案。不得不准。牽連蔓引。貽害無辜。及審明被誣。而身家已破。請嗣後凡有指稱于七一案者。槩不准行。庶奸惡之徒。不得假借叛名。誣告善良。

詔從所請。七年九月。陞內國史院大學士。充

世祖章皇帝實錄總裁官。八年七月。加太子太保。兼管

吏部尚書事。十三年二月。以病乞休。慰留之。十四年九月卒。

賜祭葬如典禮。謚文端。二十八年。

聖祖仁皇帝駕過內運河。詢知其墓。遣領侍衛內大臣費揚古往奠之。

札穆陽。滿洲正藍旗人。其祖恩克磊。於天聰八年。率戶口來歸。授三等甲喇章京。世職。旋卒。子色楞襲。以戰功加世職一等。又以

恩詔。加至三等阿思哈尼哈番。緣事降爲一等阿達哈

哈番兼一拖沙喇哈番。色楞。即札穆陽父也。札穆陽以順治十二年襲父世職。任間散章京。累陞至王府長史。以才稱。陞本旗蒙古副都統。又陞護軍統領。從征厄魯特有功。康熙三十三年。外任杭州駐防將軍。三十八年三月卒於任。

賜祭葬如典禮。謚敏恪。立碑墓道。碑文云。朕惟國家以封疆之重。慎簡良將。以備干城。果其盡瘁奉公。恪勤乃職。有勞於國。克紹其家。生既膺夫顯秩。洵被寵榮。及其歿也。飾終之典。恒加渥焉。爾札穆陽。天資厚重。

夙抱璞誠。爾祖歸自外藩。量授世職。迺考戮力用命。數著戰功。寵澤頻加。以傳於爾。惟爾能夙夜祇承。恢弘令緒。累升統領。以典護軍部。勒有方。敬勤茂著。朕念杭越乃東南重地。秉鉞之任。務在得人。遂命爾駐防。用資保障。晉以將軍之秩。俾展彈壓之功。紀律嚴明。軍容峻整。偏裨訓誡。閭閻戢和。朕方爾嘉。遽聞淪逝。撫茲勞勩。深軫於懷。寵錫爰頒。祭葬如禮。謚以敏恪。允副嘉名。嗚呼。仗節甫及五年。謳思已徧兩浙。旌旗尚新於壁壘。將士如失其父兄。惟爾實克嗣前人。

之休。用有辭於貞石。昭茲來許。勗爾後人。

格爾古德。滿洲鑲藍旗人。姓鈕祜祿氏。世居瀋陽地方。初任內閣七品筆帖式。康熙三年。從定西將軍圖海等。征湖廣茅麓山流賊。凱還。授內閣他赤哈哈番。未幾。陞內弘文院侍讀。又遷翰林院侍讀。尋陞侍讀學士。充

日講起居注官。十三年。隨安親王岳樂。征逆藩耿精忠。至湖廣湘潭。十七年。有偽將軍林興珠。投誠。王遣格爾古德。自軍中馳奏。十八年。官兵恢

復風磨嶺。復來

京奏捷。

聖祖仁皇帝屢優賞之。擢詹事府詹事。十九年四月。以任事勤勞。加一級。

賜御製詩嘉獎之。五月。隨

駕幸瀛臺。賜宴及緞足等物。十一月。又

賜貂裘袍套。二十年二月。陞內閣學士兼禮部侍郎。二

十一年正月。直隸巡撫缺出。

特旨簡任。二十三年二月。

聖祖駕幸楊邨。召格爾古德。賜鹿麀等物。是年五月。奉詔保舉賢能官員。九卿同保格爾古德清廉。七月病篤。

疏聞得

旨格爾古德才品優長。自簡任以來。操履清慎。實心任事。茂著勤勞。覽奏患病危篤。深為憫惻。

特遣御醫陳炳往治。是月卒於官。年四十四。八月。靈柩還京。直屬官民哀悼哭送者甚衆。

聖祖命內大臣覺羅吳默納。一等待衛吳達禪郊迎。至其家。賜茶酒致奠。發引之日。又

命內大臣覺羅吳默納。一等待衛吳達禪。送至瑩次。先一日奉

聖祖諭。格爾古德居官清廉。並無子嗣親族。殊屬可憫。其出殯日。部院衙門大臣願送者。送去。是日送者相繼於道。十月十九日。禮部請卹。以格爾古德在任未滿三年。任內曾經降一級。照例給與半葬。致祭一次。得

旨格爾古德自簡任以來。清廉自持。勤勞素著。應得卹典。著從優議奏。遂還其所降之級。

賜祭葬。立碑。謚文清。碑文云。朕惟國家於封圻大臣。慎重其選。務期操履堅確。性行和粹者。以加惠元元。俾享救寧之福。顧得其人矣。而無祿隕謝。朕甚痛焉。爾格爾古德。易直樸誠。出於天性。躬行刻厲。綽有令聞。方其振拔儒林。漸登侍從。服勞王事。恪慎溫恭。爰自承華。擢爲學士。歆然有如儒素。舉朝所共嘉稱。惟王政首自邦畿。民疲俗窳。朕所深念。迺卑之節旄。藉以保釐。果能砥礪清操。倡率羣吏。勤宣上意。軫卹民隱。俾百職洗心。窮簷安堵。庶幾風行草偃。聿觀體質清。

羸未堪勞劇。勉之卧治。厥疾弗瘳。萬民悲號。夫其良牧。朕盡傷無已。謚曰文清。賜卹優卹。禮有加焉。嗚呼。人臣苟能精白乃心。始終一節。則其生蒙寵任。歿享榮名者。甚隆且厚。於以風厲臣工。顯昭令德。不亦休歟。二十四年三月。聖祖復軫念不已。又遣禮部左侍郎教哈讀文致祭。二十五年三月。

聖祖駕過鳶房營。以格爾古德居官清廉可憫。遣一等侍衛費堯色。希思哈。往奠其墓。二十六年二月。

直隸士民追念其功德。公請於巡撫督學。奉其
主入順天府學名宦祠祀之。

阿蘭泰。滿洲鑲藍旗人。姓傅察氏。世居薩音納
殷地方。初任兵部筆帖式。即以清謹稱。累陞至
本部郎中。清聲益著。遷光祿寺卿。康熙二十年。
擢內閣學士兼禮部侍郎。明年充纂修平定三
藩神武方略副總裁。尋奉

命教習庶吉士。二十二年陞兵部右侍郎兼管佐領。二
十四年二月轉吏部右侍郎。三月轉左。明年陞

都察院左都御史。二十六年晉工部尚書。二十
七年二月轉兵部。五月又轉吏部尚書。明年擢
武英殿大學士。二十九年充纂修

三朝國史總裁官。三十五年料理兵部事務時

聖祖仁皇帝親征厄魯特噶爾丹。

特諭阿蘭泰曰。朕出巡後。蒙古事情奏章及諸奏章。爾
皆開看。然後奏聞。三十八年以病在告。尋卒於家。

聖祖特諭大學士等曰。大學士阿蘭泰。効力年久。品行
清純。辦事敬謹。朕聞其病篤。先遣皇長子允禔往視。

朕尚欲親臨。及皇長子允禔回奏。業已昏迷。隨聞其溘逝。朕深用震悼。即遣皇長子允禔等親臨其喪。賜鞍馬四匹。白金千金。大臣病故。雖無輟朝之例。朕心不忍。特停辦事一日。十月。

賜祭葬。加祭一次。謚文清。四十年四月。

聖祖御製碑文。立於墓道。文云。朕惟國家之務。全賴平章。簡我良臣。得之匪易。其有克副股肱之寄。積抒夙夜之勤。律已彌見小心。佐政能持大體。方切倚毗。而不假年。飾終之禮。有加。哀往之情。恒篤。用泐貞石。永

世有辭。爾武英殿大學士兼吏部尚書佐領。加二級。謚文清。阿蘭泰。有容之德。大受之材。自歷百司御事。以至爲冢卿。罔不慎。乃在位。朕甚嘉之。用俾爾弼余一人。以襄大政。爾能和衷以協力。推誠以布公。遵國家蕩平正直之途。養人心清靜寧一之福。十年之久。一青無聞。豈惟朕心所素知。抑亦羣情所悅服。至於潔廉之操。尤著美於朝端。蕭然故居。朕嘗書額示寵。且性本謙冲。義惟止足。每一求退。朕輒默然。欲斷來章。溫言批答。間有微疾。賜問頻仍。豈期近者卧病一

旬○遂爾不起○輟朝深痛○未解朕懷○賜馬賻金○卹爾身
後○臨喪祖奠○如朕親行○加祭益名○悉從優異○嗚呼○緬
生平不事聲名之迹○惟密勿常多贊助之勞○朕無溢
詞○務傳其實○尚俾知我弼臣之遺徽茂烈○足以光於
邦家○風於有位○千秋不泯○眎此豐碑○是年九月復
諭大學士伊桑阿等曰○原任大學士阿蘭泰○在日存心
端誠○爲國勤勞○素著懋績○今雖身故○應贈卹典○加授
少保兼太子太保○以示朕矜念効力年久大臣之意○
復加

恩追贈伊曾祖富棟阿○祖音達虎奇○父安達理○俱贈光
祿大夫武英殿大學士兼吏部尚書○雍正元年○
特恩加祭一次○祭文稱其賦姿純粹○立品端凝○云子富
寧安○亦仕至大學士○以功封侯○自有傳○已見世
職名臣○

法喀○滿洲鑲藍旗人○姓薩察氏○世居瓦爾喀地
方○祖額蒙克○以辦事有能○授世職牛录章京○順
治七年九年三遇

恩詔○加至二等阿達哈哈番○既卒○子法富禮襲職○法喀○

法富禮子也。康熙二十六年襲父職。四十二年。選授三等侍衛。五十四年。任烏鎗營章京。五十七年。隨靖逆將軍延信。往征準噶爾賊。三敗其衆。安藏有功。得頭等功牌三次。雍正六年。陞參領。

賜銀一百兩。七月。任查旗章京。九年。兼管佐領。十二月。委署鑲紅旗滿洲副都統。十一年九月。

特賜孔雀翎。十二月。調正黃旗滿洲副都統。明年四月。陞正黃旗滿洲都統。五月。疾作。

特旨命於圓明園調養。又

賜銀五百兩。以爲藥餌之資。未幾卒。

賜祭葬如典禮。謚勤恪。祭文云。宣力抒忱。臣子薦奉公之誼。酬庸賜卹。國家弘逮下之仁。惟始終克矢其靖。共斯存歿均叨夫渥澤。式頒奠醑。誕沛絲綸。爾法喀。持躬克謹。奉職維勤。選由勛衛之中。擢侍羽林之內。游登參領。司筦鑰以咸宜。再副統軍。飭戎行而有度。念服勤之積久。晉都統之崇階。方期膺重任以宣勞。何遽謝塵寰而溘逝。良殷軫卹。備予哀榮。考行易名。

賻金營兆於戲。逝生平之操履。克慎無愆。錫身後之褒嘉。教忠有典。必芬往薦。靈爽來歆。

諾爾遜。蒙古正黃旗人。父二等阿達哈哈番納門。見勲臣傳。諾爾遜初任二等侍衛。陞一等侍衛。再陞內大臣。以勤謹稱。侍值扈從二十餘年。

康熙九年卒。

賜祭葬如典禮。謚襄敏。碑文稱其性行純良。才能敏練。

持官敬慎。茂著勤勞云。

托波克。蒙古正白旗人。

國初。自喀爾沁地方。同巴圖來降。隨旗征討有功。入居宿衛。質實小心。崇德六年。以扈從勤勞。

賜頂帶朝衣鞍馬等物。後仕至歸化城都統。康熙九年卒。

賜祭葬如典禮。謚果壯。

巴圖。蒙古正白旗人。初由旗員。累任至護軍叅領。康熙二十三年。陞本旗副都統。二十五年卒。於任。

賜祭葬如典禮。謚恪敏。立碑墓道。碑文稱其以雄健之

材與瓜牙之選。奔走後先。無間終始。出入中外。歷有歲時云。

善丹。蒙古正藍旗人。姓白克圖氏。世居鄂爾多斯地方。少工騎射。康熙二十年。由前鋒補前鋒校。二十三年。擢三等護衛。又遷前鋒侍衛。二十九年。陞護軍叅領。四十一年。授正白旗蒙古副都統。四十五年。調正白旗滿洲副都統。四十九年。擢護軍統領。五十年。陞鑲黃旗蒙古都統。五十五年。七月。以疾卒。

賜祭葬如典禮。謚敏壯。



此
茶
小
八
時
鐘



